

REGIUN ALVRA: conferenza digls mastrals

La regiun vot dar gas

(comm./pb.) La conferenza digls mastrals dalla regiun Alvra, tgi sa cumpona digls seis cumegns dalla regiun, ò nign represchentant aint igl cunsegl grond. Or da chesta constellaziun constatescha la conferenza digls mastrals tgi en barat regular tranter igls seis presidents communals ed igls tschintg deputos saptga anfermeir la direcziun politica dalla Regiun Alvra.

Consequentamaintg èn igls mastrals e las deputadas ed igls deputos dalla Regiun Alvra sa scuntros trar en barat politic. Tar chesta emprema antupada digls politichers regiunals è d'antschatta nia rapporto sur digls affars dalla sessiun d'avost 2018 digl cunsegl grond. Tranter oter on els rapporto sur dalla revisiun parziala dalla lescha cantunala da pulizeia. Per mastrals era d'interess las explicaziuns da separaziun da pussanza dalla pulizeia communal e la pulizeia cantunala. Pinavant è nia infurmo sur dalla lescha cantunala per igl schurmetg da datas scu er sur dalla iniziativa digl pievel cantunala «bunga scola per igl Grischun» an chel senn tgi la politica vess en pled an tgapetel an impurtantas dumondas da scolaziun ed er tigl plans d'instrucziun. Igl deputos on er oriento sur dad en credit da 40 milliuns tgi igl cunsegl grond ò concedia per la digitalisaziun aint igl cantun Grischun. Per l'infrastructura da basa è responsabel igl cumegn, per la repartiziun da fegn alloura igls cumegns.

En sguard anavant

La proxima sessiun, chella digls 22 anfignen igls 25 d'otgover 2018 è er gio an vista. Cò èn

tractandos ulteriours affars impurtants. Per la Regiun Alvra è la revisiun parziala dalla lescha da planisaziun digl territori da gronda muntada. Per la debatta vegnenta aint igl cunsegl grond on igls mastrals cun occasiun digl barat politic savia communitgier lour interess tar chesta tematica. La revisiun parziala dalla lescha dallas scolas medias scu er ena evaluaziun digl li per en campus dalla Scol'ota per tecnica ed economia (HTW) a Coira èn nias discutos.

Da vart dalla Regiun Alvra è nia rapporto sur dallas tschintg consultaziuns tgi èn neidas inoltradas anfignen ossa igl 2018. Ins ò er savia orientar igls deputos sur dallas sedutas digls mastrals tgi èn stadas anfignen ossa durant igl onn current. En tema impurtant ed actual ainten la Regiun Alvra èn las comunicaziuns digl traffic public. Cò vign la conferenza digls mastrals ansemen cun igl uffez cantunal per energiea e traffic ad evaluar la situaziun actuala ed eventualamaintg elaborar propostas per migliuramaints. Igl svilup-pader regional, Daniel Kunfermann ò da sia vart infurmo igls preschaintas sur dalla sia labour digls davos 9 meis.

Resumond è nia constato tgi decisius sen scalem cantunal infuenzescha igls cumegns directamaintg u aglmanc indirectamaintg. Uscheia seiigl impurtant tgi igls represchentants digls cumegns tgeran en contact direct tigl cantun. Cotras saptgan cunaschientschas impurtantas digl cunsegl grond correr ainten la politica communal. da l'otra vart valigl dad adressar giaveischs sen scalem regional e communal via igl cunsegl grond alla regenza. Ena proxima antupada comunabla è preveida per igl schaner 2019.



(da san.) Simon Willi, mastral Lantsch; Hubert Weibel, mastral Farrera, Reto Cramer, deputo Alvaschagn; Gaby Thomann, deputada Surses; Gabi Ulber, deputada Belfort; Romano Paterlini, deputo Alvaschagn; Felix Schutz, deputo Barvogn; Luzi Schutz, mastral Barvogn Filisour, Daniel Albertin, mastral Albula/Alvra. I mantgan Aron Moser, mastral Vaz e Leo Thomann, mastral Surses.

SAVOGNIN: exposiziun

Passa 20 autos electricas per amprar

pb. Dumengia proxima, igls 14 d'otgover tranter las 10.00 e las 16.00 è a Savognin segl areal dalla Uffer SA ena exposiziun dad autos electricas.

14 marcas dad autos preschaintan lour models ed i dat er occasiun da far en gir d'amprova. Er diversas interpresas an connex cun l'energiea solara èn preschaintas all'exposiziun.



Reto Schirks da Stierva mossa sen en parcour tgi igl sies e-Haflinger canoscha prest nigns impedimaints.

Gist da curt ò igl cunsegl mundial digl clima ranfatschea alla Svizra tgi vigna fatg mengia pac per promover la mobilitad electrica. Damais è «Ela – mond d'energiea» veiramaintg agl pols digl taimp cun la sia exposiziun da dumengia proxima. I dat nigns dubis tgi electricitad scu energiea regenerabla per igls vehichels a motor fiss en grond migliuramaint per igl clima ed ena ferma reducziun dallas emissiuns da CO₂. Igl e-autos persvadan er antras ena ota effizienz d'energiea. Savens mantga l'infurmaziun, quant anavant tgi igls e-autos èn gio ainten lour svilup. Rappostas a tottas dumondas vignan dad experts durant l'exposiziun. Uscheia sen la dumonda quant gliunsch tgi ins reiva cun en e-auto, quant dei tgi dovra per carger la battareia, noua e scu saia carger ella. Ed i dat betg angal e-autos, mabagn er e-bikes e perfign autos da nez tgi von cun battareia. Reto Schirks da Stierva ò construa sez ve dad en Haflinger en indrez per la tracziun antras en motor tgi vo cun electricitad or dalla battareia. Tar l'exposiziun dattigl er divertimaint per unfants, uscheia per biagier models dad autos solars u per dar sagls segl casti dad aria. I dat er ustareia da festa per tots.